



Jean-François Rime, cusseglier naziunal da la pps, sa legra en num da l'Associazioni svizra d'artisanadi da la propaganda dal comité cunter «la taglia da medias Billag».

KEYSTONE

Na ad ina taglia da medias

Votaziun federala dals 14 da zercladur 2015

■ (anr/ld) Ier ha preschentà a Berna il comité da referendum ses arguments cunter la revisiun da la lescha davart radio e televisiun. Ils adversaris refusan ina taglia da medias e crititgeschan la grevza per las interpresas. Cunter la revisiun da la lescha davart radio e televisiun ha fatg il referendum l'Uniu d'artisanadi e mastergn. Perquai sto il pievel prender posiziun en chausa ils 14 da zercladur proxim. Per cusseglier naziunal *Jean-François Rime*, (pps/FR), munta la revisiun da la lescha davart radio e televisiun ina nova taglia da medias. El ha crititgà la situaziun nuncunentaivla. L'emprim stoppia vegnir defini il servetsch public e pir suentar il pretsch per las prestaziuns. Il parlament ed il cussegel federal sajan sa nuspids da circumscriber l'incumbensa da la SRG SRR. Quella possa fixar sezza il spazi ed ils cunfins d'agir. Plinavant fa el attent a la nova chargia per las interpresas. Quellas vegnan a stuaier pajar en l'avegnir 200 milliuns francs

empè da 40 milliuns actualmain. Ferma critica fan ils opponents davart la cumpetenza da fixar las tariffas. Il parlament haja dà al cussegel federal tutta libertad da fixar las taxas.

Rime, il president da l'Uniu d'artisanadi e da mastergn, ha crititgà l'augment massiv da las taxas per radio e televisiun. Dapi l'onn 1990 sajan quellas s'augmentadas da 279 francs sin actualmain 462.50 francs. Quai muntia in augment da 65%. Disponeva la SRG l'onn 1984 d'in budget da var 500 milliuns francs, munta quel actualmain 1,6 milliardas francs. L'immigraziun dals ultims onns ha augmentà las entradas da la SRG en la summa da var 140 milliuns francs. Rime è persvas che las tariffas vegnan a s'augmentar il proxims onn sin 700 fin 800 francs l'onn e la finala sin 1000 francs.

Senza excepziuns

Cun la nova lescha dettia quai naginas excepziuns pli. Mintgin sto pajar la taxa, schi-

zunt ils tschorvs ed ils surds, crititgescha *Petra Gössi* (pld/SZ). Il stadi pretendia adina dapli taglias e taxas. Gist en vista a la situaziun actuala cun il ferm franc svizzer saja quai grev per las interpresas da restar cumpetitivas. Quellas fissan punidas dublmain, vegniss acceptada ils 14 da zercladur anc l'iniziativa davart la taglia sin l'ierta.

Respectar las minoritads

Ils opponents èn dentant cunscients da la rolla impurtanta da la SRG SRR envers las minoritads latinhas da la Svizra. Quai saja incontestabel che la Svizra stoppia resguardar ils basegns linguistics e culturals da las minoritads latinhas, ha confermà *Lorenz Hess*, cusseglier naziunal bernais, sin dumonda da l'Agentura da novitads rumantscha. La situaziun actuala lubescha dentant a la SRG da cumprar cun daners publics serias tudestgas, films americans e Casting Shows che na tutgan betg il service public, ha constatà Hess.